



Alþingi
Efnahags- og skattanefnd
Austurstræti 8 – 10

150 REYKJAVÍK

Reykjavík, 16. 3. 2010

Efni: Frumvarp til laga um breytingu á lögum um skyldutryggingu lífeyrisréttinda og starfsemi lífeyrissjóða, nr. 129/1997, með síðari breytingum.

Í frumvarpinu er lagt til að stjórnir lífeyrissjóða verði kosnar í leynilegri kosningu á ársfundum þeirra. Þessi háttur við val stjórnarmanna komi í stað þess fyrirkomulags sem algengast er og byggir á kjarasamningum Samtaka atvinnulífsins og verkalýðshreyfingarinnar, að hvor samningsaðili tilnefni jafn marga stjórnarmenn. Þá eru lagðar til breytingar á tilhögun endurskoðunar og eftirlits og lagt til að upplýsingar um fjárfestingar í hlutabréfum, skuldabréfum, afleiðusamningum og aðrar skuldbindingar sjóðsins og stöðu þeirra séu birtar á 12 vikna fresti.

Lífeyriskerfið er stolt okkar Íslendinga og til fyrirmyndar fyrir aðra. Aðrar þjóðir verða að byggja upp lífeyrissjóði eins og hér hefur verið gert vegna þess að gegnumstreymiskerfi sem byggir einvörðungu á fjármögnun lífeyrisgreiðslna með sköttum á vinnandi fólk er ekki sjálfbært þegar öldruðum fjölgar mikið hlutfallslega eins og gerast mun á næstu áratugum.

Samtök atvinnulífsins og verkalýðshreyfingin hafa í kjarasamningum á undanförunum áratugum byggt upp lífeyrissjóði með sem eru í senn öflugir og faglega reknir. Hlutverk sjóðanna er að standa undir lífeyrisgreiðslum til þeirra einstaklinga sem iðgjöld eru greidd fyrir inn í þá bæði af einstaklingunum sjálfum og vinnuveitendum þeirra. Uppbygging sjóðanna hefur allan tímann verið samstarfsverkefni Samtaka atvinnulífsins og verkalýðshreyfingarinnar þar sem taka hefur þurft á mörgum álitamálum á borð við styttri starfsævi, meira langlífi og aukinni tíðni örorku. Einkenni þessa samstarfs hefur verið vilji beggja aðila til þess að takast á hendur mikla samfélagslega ábyrgð og hafa frumkvæði að nauðsynlegum breytingum. Mjög mikil samstaða hefur ríkt á milli Samtaka atvinnulífsins og verkalýðshreyfingarinnar um málefni sjóðanna.

Samtök atvinnulífsins líta á hlutverk sitt í sjóðunum sem mikilvægt samfélagslegt verkefni sem þau hafa metnað til að leysa vel af hendi. Markmiðið er að sjóðirnir verði meginuppspretta lífeyris landsmanna þegar fram líða stundir sem er verkefni til margra áratuga kallar á framsýni og úthald. Áhrif þeirra sem sitja í stjórnun sjóðanna á vegum Samtaka atvinnulífsins og verkalýðshreyfingarinnar eru notuð til þess að stuðla að fagmennsku í meðferð fjármuna og vaka yfir þeim breytingum sem verða á aðstæðum þeirra.

Aðild samningsaðila að stjórnun lífeyrissjóða tryggir stöðugleika, festu og frið um starfsemi þeirra. Kosning stjórnarmanna á aðalfundum lífeyrissjóða býður þeirri hættu heim að gríðarleg átök geti brotist út við stjórnarkjör og valdablokkir berjist um að koma sínum fulltrúum að til þess að ná fram tilteknum markmiðum eða sérhagsmunum. Dæmi um slík



SAMTÖK ATVINNULÍFSINS

átök má finna hér á landi í tiltölulega fámennum lífeyrissjóðum þar sem fulltrúar eru kosnir beint af sjóðsfélögum. Ástæða er til þess að óttast átök á milli lífeyrisþega og eldri sjóðsfélaga nærri lífeyristökualdri annars vegar og þeirra yngri hins vegar sem hefðu mestan áhuga á háum lífeyrissjóðslánnum til sjóðsfélaga á sem lægstum vöxtum.

Samtök atvinnulífsins hafa fyrir hönd atvinnulífsins mikinn hag af því að lífeyriskerfið sé hagkvæmt og dafni vel. Með því er stuðlað að sem hæstum lífeyri fyrir sem lægst iðgjald. Ef illa tekst til með traust til lífeyrissjóðanna og ávöxtun þeirra þá bitnar það á atvinnulífinu í formi hærri iðgjalda eða hærri skatta til þess að fjármagna lífeyri Tryggingastofnunar.

Af framangreindum ástæðum leggjast Samtök atvinnulífsins gegn samþykkt umrædds frumvarps.

Virðingarfyllst,

Hannes G. Sigurðsson,
aðstoðarframkvæmdastjóri